

खबरां

1. प्रधानमंत्री नरेंद्र मोदी होरें अज्ज गुजरात च 18 ज्हार 800 करोड़ रपे कोला मती लागत दी बक्ख-बक्ख विकास परियोजनाएं गी समर्पित कीता ऐ ते केइयें दा नीह पत्थर रक्खेआ ऐ।
2. केंद्र नै विदेशी संस्थागत निवेशकें गी सरकारी सिक्यूरिटी हंडियें सवां होने आहले पूंजीगत फायदें पर टैक्स दी छूट दित्ती ऐ।
3. भारती रिजर्व बैंक नै मौजूदा माली बरे च रेपो रेट गी 5 इशारिया 2-5 फीसदी पर बनाई रखदे होई एहदे च कोई बदलाव नेई कीता ऐ। जीडीपी विकास दर दे अनुमान गी पैहले दे 6 इशारिया 9 फीसदी सवां घटाइयै 6.6 फीसदी करी दित्ता ऐ।
4. नेपाल दे विदेश मंत्री शिशिर खानाल होर 3 रोजा दौरै लेई अज्ज नमीं दिल्ली पुज्जी गे न।
5. अज्ज विश्व पर्यावरण ध्याड़ा मनाया जा'रदा ऐ। सरकार नै नमीं दिल्ली च 18 नमो आक्सीजन पार्कें दा उद्घाटन कीता।
6. ते हाकी च भारत नै जपान च मर्दे दे अंडर-18 एशिया कप दे सेमीफाइनल च पाकिस्तान गी 5-3 कन्नै हराई दित्ता ऐ। भारत हून जपान कन्नै खताबी मुकाबला खेडोग।

<><><><><><>

PM-Surat

प्रधानमंत्री नरेंद्र मोदी होरें अज्ज सूरत दा दौरा लाया ते शिड़क, उर्जा ते उद्योगिक क्षेत्र दियें 18 ज्हार 800 करोड़ रपें कोला मती लागत आहिलियें बक्ख-बक्ख विकास परियोजनाएं दी शुरूआत कीती। प्रधानमंत्री होर पैहले हजीरा गे ते इक बड़े किट्टु गी संबोधित करने कोला पैहलें उनें उत्थै चला करदी उद्योगिक ते मूल ढांचे मतल्लक परियोजनाएं दा जायजा लैता। मगरा प्रधानमंत्री होरें दमन दा दौरा लाया ते उत्थै तकरीबन 2 ज्हार 970 करोड़ रपे दियें बक्ख-बक्ख परियोजनाएं दा नीह पत्थर रक्खेआ इन्दे च मुख्यै लेई सेहत दी हिफाजत आहली मुख् सेवाएं ते हवाबाजी सरबन्धी मूल ढांचे आहली परियोजनां शामिल हियां। उनें केंद्र शासित प्रदेश लक्षदीप लेई महत्वै आहली समुंद्री परियोजना दा बी नीह पत्थर रक्खेआ।

<><><><><><>

Tax-Exemption

सरकार नै विदेशी संस्थागत निवेशकें गी सरकारी सिक्यूरिटी हंडियें च होने आहले पूंजीगत फायदें ते व्याज आमदनी पर पूरी चाल्ली टैक्स दी छूट देई दित्ती ऐ। एह छूट इस बरे पैहली अप्रैल सवां लागू होग। सरकार नै इस सरबन्धा च आमदनी टैक्स (संशोधन) अध्यादेश 2026 जारी कीता ऐ। खजाना मंत्रालय नै आखेआ ऐ जे इस गैंड कन्नै सरकारी सिक्योरिटी हंडियें पर कराधन कर्क मुलखें दे बरोबर होई जाहग।

<><><><><><>

RBI

भारती रिजर्व बैंक आर.बी.आई नै मौजूदा माली बरे च लगातार दुई बारी मौद्रिक नीति समीक्षा च मुख् ब्याज दरें च कोई तब्दीली नेई कीती ऐ। द्विमासिक मौद्रिक नीति दी घोशणा करदे होई बैंक दे गवर्नर संजय मल्होत्रा होरें आखेआ जे मौद्रिक नीति मतल्लक कमेटी नै सब्भनं दी सहमति कन्नै रेपो दर गी 5 इशारिया 2-5 फीसदी पर बनाई रखने दा फैसला लैता ऐ जेल्ले के नीतिगत रूख-न्यूटल रक्खेआ गेआ ऐ। स्थाई जमा सहूलत दर 5 फीसदी बनी दी ऐ जेल्ले के सीमांत स्थाई सुविधा ते बैंक दर 5 इशारिया 5 फीसदी बनी दी ऐ बैंक नै मौजूदा माली बरे लेई जीडीपी बाढ़े दे अनुमान गी पैहले दे 6 अशारिया 9 फीसदी थमां घटाइयै 6 इशारिया 6 फीसदी करी दित्ता ऐ।

<><><><><><>

ASSOCHAM

उद्योग संगठन एसोचैम नै आरबीआई दी रेपो दर गी 5 अशारिया 5-5 प्रतिशत पर बनाई रखने आहले निरने दी सराहना करदे होई आखेआ जे एहू विकास गी गति देग ते उद्योग जगत गी तगड़ा करोग। एसोचैम दे महासचिव सौरभ सान्याल होरें आखेआ जे एहू निरना आर्थिक प्रगति दे कन्नोकत्री मुद्रास्फीति गी इक सुरक्षित दायरे च बनाई रखने च मददगार होग।

<><><><><><>

Nepal-Foreign

नेपाल दे विदेशी मामलें सरबन्धी मंत्री शिशिर खानल अजै थमां भारत दे 3 दिनें दे दौरे पर न। बदेश मंत्री डा. एस जयशंकर हुंदे साढ़े पर भारत दौरे पर आए न। अपने दौरे दरान श्री खानल नमीं दिल्ली च डा. जयशंकर हुंदे कन्नै मिलंगन। अपने इक बयान च नेपाल दे विदेश मंत्रालय नै आखेआ ऐ जे दमैं धड़े इस दरान दपक्खया हितें आहले मुद्दें पर चर्चा करडन तां जे बन्ज बपार, पूंजी निवेश, संचार, उर्जा ते लोकें-लोकें बश्कार सरबन्ध मजबूत करने आहली भेठा आपसी सहयाग तगड़ा कीता जाई सकै।

<><><><><><>

HM-Border Searching

केंद्री गृह मंत्री अमित शाह होरें अज्ज त्रिपुरा च लंकामुरा बन्ने आहली चैकी पर सीमा सुरक्षा बल दे जवानें गी संबोधित करदे होई बन्ने दी सुरक्षा गी लेइयै इक्क व्यापक दृष्टिकोण पेश कीता ऐ। गृह मंत्री होरें बन्ने दी सुरक्षा पर जोर दिंदे होई आखेआ जे सरकार नै त्रिपुरा, पच्छिम बंगाल ते बिहार दे बन्ने आहले इलाके कश गैर कनूनी ढंगै कन्नै आबादी च होने आले बदलाव गी रोकने दा पक्का धेइया कीते दा ऐ। उनें जानकारी दिती जे बन्ने आहली बाड़ दे पराने हिस्से गी बदलने लेई 119 किलोमीटर नमीं तारबंदी दा निर्माण करने दी मंजूरी देई दिती गेई ऐ।

<><><><><><>

CBSE-Post Results

12मीं जमातै दे नतीजे दे घोशणा मगरा सीबीएसई आसेआ शकैतें दे नबटारे गितै 70 ज्हार दरखास्तां हासिल कीतिआं गेइयां न। इंदे चा नम्बरें दी तस्दीक कराने आहिलयां 314 दरखास्तां न ते पर्चे दे परतियै मूल्यांकन लेई 63 ज्हार दरखास्तां न। सीबीएसई नै स्कैन कीती गेदिएं पर्चे दी नकल ते परतिग मूल्यांकर दी तस्दीक लेई मंगलवारें आनलाइन पोर्टल खोले दा हा। 13 मई गी 12मीं जमातै दे नतीजे घोशित होने मगरा किश विद्यार्थिग हासल होए दे नम्बरें ते ओ.एस.एम सरिस्ते पर रोह-रोस्सा ते शक-शुबह प्रगट कीता।

<><><><><><>

Prez. Padma Award

राष्ट्रपति द्रौपदी मुर्मू होर इस म्हीने दी 23 तरीक गी दुए नागरिक अलंकरण समारोह दरान 2026 बरे लेई 65-एं उत्कृष्ट अवाडर्स कन्नै सम्मानित करंगन। एहदे शा पैहले पिछले म्हीने राष्ट्रपति होरें पैहले नागरिक अलंकरण समारोह दरान राष्ट्रपति भवन च 66एं मन्त्री दिएं शख्सियतें गी पद्म पुरस्कारें कन्नै सम्मानित कीता हा। इस बरे राष्ट्रपति होरें 5एं पद्मविभूषणें, 13 पद्मभूषणें ते 113एं पद्म श्री अवाडें समेत 131एं पद्म अवाडें गी मंजूरी दिती ऐ। एहू अवार्ड हर बरे गणतंत्र दिवस दे मौके पर घोशित कीते जंदे न।

<><><><><><>

Annamalai-Resignation

भारती जनता पार्टी दे अध्यक्ष नितिन नबीन होरें तमिल नाडू पार्टी दे राज्याध्यक्ष के. अन्नामलाई हुंदा पार्टी दी मुंडली सदस्यता थमां इस्तीफा मंजूर करी लैता ऐ। हाल च गै अन्नामलाई होरें भारती जनता पार्टी दे अध्यक्ष होरें गी अपना इस्तीफा दिता हा।

<><><><><><>

IMD-Weather

भारत दे मौसम सरबन्धी मैहकमे नै आखेआ ऐ जे अगले दऊं-त्रऊं दिनें च दक्खन पच्छमी बरसांत दे मध्य अरब सागर दे किश हिस्सें, गोवा, महाराष्ट्र, आंध्र प्रदेश, कर्नाटक, तमिलनाडू ते उत्तर पूर्व दे राज्यें दे किश हिस्सें च अगो बढने लेई हालात साजगार न। मौस मसरबन्धी एजेंसी नै दिनें कर्नाटक दे समुंद्री कंडे आहले इलाकें, केरल ते

माहे, कर्नाटक ते तमिलनाडू दे उत्तरी अंदरूनी इलाकें, पुदुचेरी ते कराईकल च भारी कोला भारी बरखा पौने दी पेशनगोई कीती ऐ।

<><><><><><>

US-Prez. Hezbollah

अमरीका दे राश्ट्रपति डोनल्ड ट्रम्प होरें आखेआ ऐ जे लेबनान ते पच्छमी एशिया इलाके च तनोतनी गी घट्ट करने लेई अमरीका नै सिद्दे हेजबुल्ला कन्नै संपर्क बनाए दा ऐ। ट्रम्प होरें व्हाइट हाउस च बोलदे होई आखेआ जे लेबनान च हिंसा गी घट्ट करने दे मकसद कन्नै कीती जा करदी गल्लबात च प्रगति होई ऐ। हेजबुल्ला आसेआ अमरीका दे शांति प्रस्ताव गी खारिज करने दी रिपोर्टां आने दे मगरा ट्रम्प हुंदा एहू बयान आया ऐ। उनें आखेआ जे ओहू इस मसले पर इजराइल दे प्रधानमंत्री ते होरनें इलाकाई लीडरें कन्नै गल्लबात करी चुके दे ना।

<><><><><><>

Namo Oxyten Ranks

पर्यावरण, जंगलात ते जलवायु परिवर्तन मंत्री भूपेंद्र यादव होरें दिल्ली दी मुख्मन्त्री रेखा गुप्ता हुंदे कन्नै विश्व पर्यावरण ध्याडे दे मौके पर राजधानी दिल्ली च 18 नमो आक्सीजन पार्कें दा उद्घाटन कीता ऐ। इस मौके पर केंद्री मंत्री होरें एक पेड मां के नाम अभियान दे तैहत केई पर्यावरण सरबंधी पैहलें दी शुरूआत कीती। श्री यादव होरें आखेआ जे प्रधानमंत्री नरेंद्र मोदी हुंदी अगुवाई च भारत पर्यावरण दी हिफाजत दे क्षेत्र च कुल संसारी स्तरें पर अगुवा मुख्म बनिचै उभरेआ ऐ। इस मौके पर दिल्ली दियें मुख्मन्त्री रेखा गुप्ता होरें आखेआ जे दिल्ली दी हवाऊ दी गुणवत्ता च सुधार लेई हरियाली च बाढा करना महत्वै आहले उपाएं चा इक ऐ।

<><><><><><>

Ek Ped Maa Ke Naam

केंद्री सूचना ते प्रसारण मंत्री डा. एल. मुरुगन होरें अज्ज नमीं दिल्ली च आकाशवाणी दे अहाते च एक पेड मां के नाम अभियान तैहत इक्क बहटा लाया। आकाशवाणी समाचार कन्नै गल्लबात करदे होई डा. मुरुगन होरें नागरिकें गी पर्यावरण दी हिफाजत करने दा संकल्प लैने दी अपील कीती। उनें पानी बचाने, बूहूअे लाने ते उंदी रक्षा ते हिफाजत करने पर जोर दिता।

<><><><><><>

PM-Environment

तोआई, प्रधानमंत्री नरेंद्र मोदी होरें विश्व पर्यावरण दिवस दे मौके पर सब्भनें गी दिली शुभकामनां दित्तियदां न ते आखेआ ऐ जे एक पेड मां के नाम ज्नेहियें पैहलकदमिएं कन्नै हर बरे जंगलें च 1 लक्ख 10 ज्हार हेक्टेयर रकवे दा बाढा दर्ज कीता जा'रदा ऐ। सोशल मीडिया पर अपनिएं किन्नियें गै पोस्टें च श्री मोदी होरें आखेआ जे एहू ध्याडा पर्यावरण दी सांभ सम्भाल ते सतत विकास गी तगडा करने गितै धेइया करने दा मौका हासल करोआना ऐ।

<><><><><><>

CM-Env. Day

विश्व पर्यावरण दिवस दे मौके पर मुख्मन्त्री उमर अब्दुल्ला होरें पर्यावरण दी राक्खी ते टिकाऊ विकास लेई सरकार दी बचनबद्धता गी फ्ही पक्का कीता ऐ। इक सोशल मीडिया पोस्ट च मुख्मन्त्री होरें लोकें गी अपील कीती जे हर इक माहनू अपनी कुदरती विरासत दी राक्खी हिफाजत लेई ते औने आहली पीढियें लेई इक्क हरा-भरा, साफ-सुथरा, सेहतमंद ते जलवायु अनुकूल जम्मू-कश्मीर बनाने दे सांझे मिशन च शामिल होऐ।

<><><><><><>

LG-Nashamukt Ganderbal

नशामुक्त जम्मू-कश्मीर अभियान दे इक हिस्से दे तौरा पर अज्ज गांदरबल जिले च उपराज्यपाल मनोज सिन्हा हुंदी अगुवाई च ज्हारां बदे लोक नशीले पदार्थें खलाफ इक्क बड्डी पदयात्रा च शामिल होऐ। इस मौके पर किट्ट गी संबोधित करदे होई एल.जी होरें आखेआ जे जम्मू-कश्मीर च नशीले पदार्थें खलाफ एहू लडाई इक जन आंदोलन च तब्दील होई गेदी ऐ। उनें आखेआ जे प्रशासन उसलै तगर अपनी कार्रवाई जारी रक्खग जिसले तगर जम्मू-कश्मीर थमां नशीले पदार्थें दी तस्करी करने आले ते एह्दे कन्नै जुडे दे आतंकवाद सरबंधी तंत्र दा पूरी चाल्ली खात्मा नेई होई जंदा। उनें आखेआ जे 55 दिन पैहले शुरू कीते गेदे नशामुक्त जम्मू-कश्मीर अभियान दा मकसद नौजवानें गी

नशे दी माझी कवैतू थमां बचाना ते नशीले पदार्थे दे कारोबार राहें आतंकवाद गी माली मदाद देने आले नेटवर्क गी खत्म करना ऐ।

<><><><><><>

Hockey

हाकी च भारत नै पाकिस्तान गी जपान दे काकामीगाहारा च मर्दे दे 18एं बरें दी हेठली बरेसू आहले एशिया कप 2026 दे सेमीफाइनल च 5-3 कन्नै हराई दित्ता। भारत नै बड़े गै शानदार खेड्डु दा प्रदर्शन करियै फाइनल अपनी थाहर पक्की करी लैती ऐ। हून फाइनल च भारत दा मुकाबला मेजबान जपान कन्नै होग। जपान नै मलेशिया गी 8-1 कन्नै हराइयै फाइनल च अपनी थाहर पक्की करी लैती ऐ। महिलाएं आहले 18एं बरें दी हेठली बरेसू आहले एशिया कप च भारती टीम अज्ज सेमीफाइनल च Pelalty Shoot out च चीन थमां हारी गई ते प्रतियोगिता च सुन्ने दा तगमा हासिल करने आहली द्रौड शा बाहर होई गई ऐ।

<><><><><><>